



N 21/2092  
30/05/2022

2092-21-2-202205301223



შპს „სტანდარტ ცემენტს“  
მის: ქ. რუსთავი, მშვიდობის ქ. N6ა  
ელ. ფოსტა: [didostati\\_888@mail.ru](mailto:didostati_888@mail.ru)

**ასლი: სსდ გარემოსდაცვითი ზედამხედველობის დეპარტამენტს**

სსიპ გარემოს ეროვნულმა სააგენტომ განიხილა თქვენი 2022 წლის 10 მაისის N1460 გარემოსდაცვითი გადაწყვეტილების მიღების მიზნით წარმოდგენილი განცხადება, რომელიც ეხება ქ. რუსთავში შპს „სტანდარტ ცემენტის“ ცემენტის საწარმოს ექსპლუატაციის პირობების ცვლილებას.

გაცნობებთ, რომ გზშ-ის ანგარიშში არ არის მოცემული და დაზუსტებას საჭიროებს საქმიანობასთან დაკავშირებული შემდეგი საკითხები:

- საქართველოს გარემოს დაცვისა და სოფლის მეურნეობის სამინისტროს №60 (01.12.2021) სკოპინგის დასკვნის თანახმად, ტერიტორიის ელექტრონული გამომწვებით დადგინდა, რომ საპროექტო ობიექტის სიახლოვეს არსებულ არასასოფლო-სამეურნეო მიწის ნაკვეთებზე განთავსებულია შემდეგი კომპანიები: შპს „სანდო“ (ს/კ: 02.05.03.363); შპს „ქართული პროდუქცია“ (ს/კ: 02.05.03.015); შპს „ვერძი“ (ს/კ: 02.05.03.080); შპს „ფერო ელოის ფროდაქშენი“ (ს/კ:02.05.03.372); შპს „ევროსტანდარტი“ (ს/კ: 02.05.03.673); შპს „ანტონი“ (ს/კ: 02.05.06.558); შპს „გილდია“ (ს/კ:02.05.06.217); შპს „პროგრესი“ (ს/კ:02.05.03.001); შპს „გრანდი“ (ს/კ: 02.05.03.747, 02.05.03.746), რომელთა ფუნქციური დატვირთვის შესახებ ინფორმაცია გზშ-ის ეტაპზე საჭიროებდა დაზუსტებას. წარმოდგენილ დოკუმენტში მოთხოვნილი ინფორმაცია მოცემული არ არის.
- სამინისტროს №60 (01.12.2021) სკოპინგის დასკვნის შესაბამისად, დაზუსტებას საჭიროებდა ცემენტის წარმოების მეორე ტექნოლოგიური ხაზის და შესაბამისი გარემოსდაცვითი გადაწყვეტილების (22/02/2018; N 2-96) შესახებ ინფორმაცია. აგრეთვე, დაზუსტებას საჭიროებდა რის საფუძველზე უწყევს ექსპლუატაციას შპს „სტანდარტ ცემენტი“ საწარმოო ტერიტორიაზე არსებულ, ცემენტის წარმოების მეორე ტექნოლოგიურ ხაზს და რატომ განიხილავს ექსპლუატაციის პირობების ცვლილების პროექტის ფარგლებში. ზემოაღნიშნული სკოპინგის დასკვნით კომპანიას დაევალა ორივე ტექნოლოგიური ხაზის ექსპლუატაციის შემთხვევაში,

**გზმ-ის ანგარიშის წარმოდგენამდე უზრუნველყო „გარემოსდაცვითი შეფასების კოდექსის“ მე-15 მუხლით გათვალისწინებული მოთხოვნების დაცვა.**

„გარემოსდაცვითი შეფასების კოდექსის“ მე-15 მუხლის შესაბამისად, საქმიანობის განმახორციელებელი უფლებამოსილია გარემოსდაცვითი გადაწყვეტილება სრულად ან ნაწილობრივ სხვა პირს გადასცეს, თუ ეს არ ეწინააღმდეგება ამ გადაწყვეტილებით გათვალისწინებული საქმიანობის არსს, განსაზღვრულ პირობებს ან/და საქართველოს კანონმდებლობით დადგენილ მოთხოვნებს. გარემოსდაცვითი გადაწყვეტილების გადაცემა გულისხმობს როგორც უფლებების, ისე შესაბამისი მოვალეობების (მათ შორის, ამ გადაწყვეტილების გადაცემამდე ადმინისტრაციული მიწერილობით განსაზღვრული ვალდებულებების) გადაცემას. სააგენტო გარემოსდაცვითი გადაწყვეტილების გადაცემის თაობაზე განცხადებას იხილავს და გადაწყვეტილებას იღებს საქართველოს ზოგადი ადმინისტრაციული კოდექსით დადგენილი მარტივი ადმინისტრაციული წარმოების წესით. ხოლო პირი, რომელსაც გარემოსდაცვითი გადაწყვეტილება გადაეცა, ვალდებულია შესაბამისი საქმიანობა განახორციელოს **მხოლოდ სააგენტოს მიერ აღნიშნული მუხლით განსაზღვრული გადაწყვეტილების მიღების შემდეგ.**

წარმოდგენილ დოკუმენტში აღნიშნულ საკითხთან მიმართებით მითითებულია, რომ „შპს „დიდოსტატს“ და შპს „სტანდარტ ცემენტს“ შორის გაფორმებული საიჯარო ხელშეკრულების მიხედვით, საწარმოს ტერიტორიაზე არსებული ორივე ცემენტის წისქვილი, სხვა ქონებასთან ერთად გადაცემულია შპს „სტანდარტ ცემენტზე“. ამასთან, სააგენტოში არსებული ინფორმაციით, 2018 წლის 22 თებერვლის N 2-96 ბრძანებით გაცემული გარემოსდაცვითი გადაწყვეტილების შპს „დიდოსტატიდან“ შპს „სტანდარტ ცემენტზე“ გადაცემა არ განხორციელებულა. გაცნობებთ, რომ იჯარის ხელშეკრულება არ იძლევა გარემოსდაცვითი გადაწყვეტილებით გათვალისწინებული საქმიანობის შესაბამისი ნებართვის გადაცემის გარეშე განხორციელების უფლებას. შესაბამისად, შპს „სტანდარტ ცემენტმა“ გზმ-ის ანგარიშის წარმოდგენამდე **უნდა უზრუნველყოს „გარემოსდაცვითი შეფასების კოდექსის“ მე-15 მუხლით გათვალისწინებული მოთხოვნების დაცვა.**

- №60 (01.12.2021) სკოპინგის დასკვნის თანახმად, გზმ-ის ანგარიშში სრულად უნდა ყოფილიყო ასახული ობიექტზე გარემოსდაცვითი ზედამხედველობის დეპარტამენტის მიერ ჩატარებული გეგმიური/არაგეგმიური შემოწმებების, გამოვლენილი დარღვევების (არსებობის შემთხვევაში), მათი აღმოფხვრისთვის განსაზღვრული ქმედებების/გონივრული ვადების და განსაზღვრულ ვადებში შესასრულებელი (შესრულებული) გარემოსდაცვითი ღონისძიებების შესახებ ინფორმაცია; აღნიშნული ინფორმაცია წარმოდგენილ გზმ-ის ანგარიშში ასახული არ არის.
- გზმ-ის ანგარიშში, 4.2.1 ქვეთავში მითითებულია, რომ არსებულ საწარმოში განთავსებულია 13 ერთეული სილოსი, მათ შორის 12 სილოსი არის 60 მ<sup>3</sup>, ხოლო ერთი – 15 მ<sup>3</sup> მოცულობის. თუმცა, დოკუმენტის 4.2.2 ქვეთავის თანახმად, სილოსების რაოდენობა შეადგენს 14 ერთეულს, თითოეული არის 65 და 60 ტ, ხოლო ერთი - 20 ტ მოცულობის, ჯამურად 885 ტ მოცულობით. აღნიშნული ჩანაწერები წინააღმდეგობაში მოდის ერთმანეთთან, შესაბამისად, დაზუსტებას საჭიროებს არსებულ საწარმოში არსებული სილოსების რაოდენობა და მოცულობა.

სააგენტო კანონმდებლობის შესაბამისად გარემოსდაცვითი გადაწყვეტილების გაცემის მიზნით ადმინისტრაციულ წარმოებას დაიწყებს ზემოაღნიშნული შენიშვნების გათვალისწინებით მომზადებული კანონმდებლობით გათვალისწინებული სრულყოფილი დოკუმენტაციის წარმოდგენის შემდეგ.

თეიმურაზ მთივლიშვილი



სააგენტოს უფროსის დროებით ფუნქციების შემსრულებელი

სსიპ გარემოს ეროვნული სააგენტო

